

**Kalaallit qimmiata aammalu qimussersuartoqartarneratalu qanoq ililluni kulturikkut piujuartinneqarsinnaaneri pillugit Naalackersuisut misissueqqullugit peqquneqarnissaannik inatsisartut aalajangiiffigisassaattut siunnersuut. Susasaqartut peqatigalugit misissuineq ingerlanneqassaaq, misissuinerlu inatsisartunut agguanneqarumaarluni.**

(Inatsisartuni ilaasortaq Doris J. Jensen, Siumut)

### **Akissuteqaat**

(Ilinniartitaanermut, Kultureqarnermut, Ilageeqarnermut Nunanullu Allanut Naalackersuisoq)

### **Siullermeerneqarnera**

Naalackersuisut Inatsisartuni ilaasortap Doris J. Jensenip Siumumeersup Inatsisartut aalajangiiffigisassaattut siunnersuummik saqqummiussaqaamat qujapput.

Naak nunatta ilarujussuani qimussertoqarneq ajoraluartoq imaluunniit qimusserneq kulturitut ingerlanneqanngikkaluartoq Avannaata Qimussersua ingerlanneqaraangat inuit amerlanerpaartaat pissangasut nuannaartullu takussaalertarput. Tamannalu qimmimut qimuttumik taassuminngalu kultureqarnermik ukkassinermik pilersitsisarpoq.

Kinguaariit kingulliit inuunerinnaanni qimminut qimuttunut tunngatillugu pisoqangaatsiarnikuuvoq; piniariaatsit nutaat, teknologiip tungaatigut ineriartorneq pissutsillu allarpasuit kalaallit qimmiisa qimuttut amerlassusiannut sunniisinnaasut atugaalersimapput. Taamaammallu qujanarpoq ineriartortoqarnerup ajortup akiorniarnissaanik kissaateqartoqarnera politikikkut pingaartinneqarmat.

Qujanartumillu inuiaqatigiinni qimmit qimuttut immikkuullarinneranik kulturikkullu kingornussatut pigiinnarnissaat pillugit arlalitsigut suliniartoqarpoq. Assersuutitullu taaneqarsinnaavoq ilisimatusaatigalugu suliaq "Qimmeq", qimmeq qimuttoq pillugu ilisimasat pigilerneqarnissaannik qulakkeerinninnissamik siunertaqartoq. Naalackersuisut 2018-imi suliniummut tapersersuiniarlutik nalunaareerput. Suliniut tassani angusarineqartut qimmip pigiinnarnissaa pillugu siunissami suliniutissanut aallaavittut atorneqarsinnaanissaat neriuutiginarpoq.

Naalackersuisut nuannaarutigilluagaannik inuutissarsiutigalugu namminersortut qimussertarnerup kulturitut pigiinnarnissaanut namminneerlutik suliniuteqalersunik peqarpoq. Kalaallit qimmiat pillugu ornittakkamik qanittukkut pilersitsisoqarsimanera arlallit immaqa tusagassiorfitsigut atuareersimassavaat, tassani siunertarineqarluni takornariat Ilulissat Kangerluanni qimusserlutik angallattalernissaat, assersuutigalugulu ukiuunerani kangerlummi aalisarnerup qanoq ittuunera misigitillugu. Inuit suliniutinik imminnut qimuttumullu kiisalu kulturimut iluaqutaasinnaasunik aallartitseqqullugit Naalackersuisut kaammattuinnarsinnaavaat.

Nunatsinni inuit amerlassusiannut sanilliullugu ikittuinnaat qimmit sukkaniunnerannut peqataasarput. Siunissami kalaallit qimmiata immikkut qimmitut piginnarnissaa qanoq ililluni qulakkeerneqarnissaa aamma qimmit sukkaniuttarnerat kulturitsinnut ilaasutut qulakkeerneqarnissaa misissuiffiqineqassapat kommunit qimmeqarfiusut peqataatissallugit pingaartorujussuuvoq, taakkuuppummi sinaakktissanik inerisaasussat. Piffinni qimmeqarfiusuni tapiissuteqariaatsit kommunit peqatigalugit misissornissaat Naalakkersuisunut soqutiginaateqarpoq.

Naalakkersuisut taamatut oqaaseqarlutik siunnersuut akuerineqassasoq inassutigaat.